

Diskursu
husi SE Embaixador YAMAMOTO Yasushi
iha okaziaun Resepsaun Aniversáriu Imperadór nian
2 Marsu 2026

Ha'u sente kontente tebes atu simu imi hotu iha Resepsaun Loron Nasionál Japaun nian iha kalan ne'e. Tinan ida-ne'e, ita mai hamutuk iha ne'e atu selebra aniversáriu ba dala 66 Sua Majestade Imperadór Japaun nian iha semana ida liubá iha loron 23 fulan-Fevereiru.

Ha'u hakarak hahú ha'u-nia diskursu hodi ható'o ha'u-nia agradesimentu sinseru ba Sua Exelénsia Prezidente Dr. José Ramos-Horta ba nia prezensa iha kalan ne'e, no ba apoiu hirak ne'ebe mak kontinua fó ba relasaun diak entre Japaun no Timor-Leste.

Sua Majestade sira Imperadór no Imperatriz sempre reza ba moris-di'ak povu Japaun nian no povu iha mundu tomak. Sua Majestade sira reza liuliu ba dame mundiál no preokupa ho vítima sira hosi dezastre naturál sira no sira ne'ebé serbisu iha liña oin hodi fó tulun tantu iha rai-laran no iha rai-li'ur. Sua Majestade maka símbolu Estadu nian, no unidade povu Japaun nian.

Ha'u apresenta ona Kredensiál ba Sua Exelénsia Prezidente Ramos-Horta iha fulan rua liubá iha loron 9 fulan Janeiru. Ida-ne'e mak ha'u-nia Resepsaun Loron Nasionál dahuluk nu'udar uma-na'in iha ne'e iha Timor-Leste.

Foin lalais ne'e ha'u hahú ha'u nia kargu, maibé felizmente ha'u iha ona sasán folin-boot tolu antes ha'u to'o.

Ha'u-nia rikusoin dahuluk mak istória riku kona-ba amizade no kooperasaun ne'ebé ita-nia antesór sira harii beibeik tantu iha Japaun no iha Timor-Leste durante kuartu sékulu ida dezde Timor-Leste restaura nia independénsia.

Nu'udar rezultadu, iha Timor-Leste tomak, inklui área foho no remota sira, iha ona projetu lubuk ida ne'ebé hetan apoiu hosi Japaun iha infraestrutura, diversifikasaun ekonómika inklui agrikultura no peska, redusaun risku dezastre, transformasaun verde, governasaun, desenvolvimentu rekursu umanu, no mós iha edukasaun, no saúde.

Nu'udar kestaun ida, bainhira ha'u foin hetan onra atu hasoru malu ho Sua Exelénsia Prezidente, nia tau presaun konsideravel mai ha'u hodi temi naran barak hosi ha'u-nia antesór sira ne'ebé fó ona kontribuisaun, no katak se ha'u la serbisu maka'as hanesan sira, ema ida sei la hanoin ha'u nu'udar Embaixador di'ak ida hafoin ha'u kompleta ha'u-nia mandatu iha Timor-Leste.

Ho ida-ne'e ha'u kompromete ba Sua Exelénsia Prezidente no ema hotu katak, durante ha'u nia mandatu, ha'u sei halo esforsu tomak atu halo progresu konkretu iha ita-nia relasaun bilaterál sira.

Ha'u nia rikusoin daruak maka ita-nia nasaun rua ne'e hetan ona istória amizade no kooperasaun nian no hadi'a ita-nia relasaun ba Parseria Komprensivu iha 2023. Iha Agostu tinan kotuk, Primeiru-Ministru Japaun nian iha tempu ne'ebá no Sua Exelénsia Prezidente konfirma sira nia kompromisu

atu hametin liután Parseria Komprensivu. Ha'u fiar katak kompromisu forte husi líder sira sei kontinua sai hanesan katalizadór ba ita-nia parseria ne'ebé sólidu.

Númeru ne'ebé aumenta ba beibeik hosi empreza, ONG no indíviduu japoneza sira hala'o hela dezafiu foun sira iha Timor-Leste. Entre parseiru sira-ne'e, representante sira hosi Frontline, Parci, Peace Winds Japan, Tsuneishi Timor Shipbuilding, no Wakachiku Construction, sei apresenta sira nia atividade, servisu no produktu sira iha kabina sira RP nian ohin. Favor vizita sira iha Salaun Multiuzu hafoin serimónia ida-ne'e.

Rikusoin datoluk ne'ebé ha'u iha maka jersaun foun iha ita-nia nasaun rua, ne'ebé mosu atu lori konfiansa entre ita ba futuro. Liuliu, ha'u sente futuro ne'ebé nabilan ba Timor-Leste, nakonu ho enerjia juvenil. Foin semana kotuk, ha'u sai uma-na'in ba Resepsaun Alumni Japaun nian iha ne'e iha ami nia Embaixada. To'o ohin lora, maizumenus timoroan na'in 130 mak estuda ona iha Japaun ba tempu naruk no tinan ida ne'e joven timoroan na'in 15 seluk sei ba Japaun hodi kontinua ensinu superiór.

Adisionalmente, iha fulan Setembru ne'e sei haree Jogu Aziátiku ba dala 20 no Jogu Para Aziátiku ba dala 5 iha Nagoya, Prefeitura Aichi, Japaun, ho atleta sira ne'ebé partisipa hosi nasaun no rejiaun 45, inklui Timor-Leste. Enkoraja tebes atu haree ligasaun sira iha área oioin inklui desportu entre foin-sa'e sira, ne'ebé sei forma futuro, sai metin liután. Ha'u iha konfiansa katak amizade no kooperasaun entre ita-nia nasaun rua sei kle'an liután.

Saida maka sorte liu ba ha'u maka ha'u to'o iha momentu krusiál ida ne'ebé permite ha'u atu aproveita rikusoin tolu ne'e. Ha'u hatoo dala ida tan ha'u-nia parabéns ba Timor-Leste tanba ninia adezaun formál ba ASEAN iha fulan Outubru liubá. Ha'u iha espetativa boot katak Timor-Leste sei hala'o papél ida ne'ebé importante ba beibeik iha rejiaun ida-ne'e no comunidade internasionál.

La presiza dehan katak sai membru ASEAN nian implika responsabilidade oioin. Dezenvolvimentu infraestrutura maka área ida husi responsabilidade hirak ne'e. Dezenvolvimentu kontinua ba Aeroportu Internasionál Dili no Ospital Nasionál Guido Valadares, ne'ebé daudaun ne'e avansa hela hanesan projetu ODA Japaun nian, signifikativu hosi perspectiva ida-ne'e. Aleinde ne'e, dezenvolvimentu rekursu umanu kleur ona sai hanesan área ida ne'ebé Japaun fó prioridade, no projetu relevante sira sei krusiál liu partikularmente tuir adezaun ba ASEAN.

Ohin, iha situasaun mundiál ne'ebé muda lalais, Japaun sei kontinua servisu no la'o hamutuk ho Timor-Leste nu'udar belun, fahe valór fundamentál sira hanesan liberdade, democracia, estadu direitu, no direitus umanus.

Iha kalan ne'e, ami hein katak ita-boot sira sei haksolok ho tempu ne'ebé di'ak hodi celebra Sua Majestade Imperadór nia aniversáriu, gosta hahán Japaun nian, inklui sushi ne'ebé foin prepara hosi ami-nia xefe-da-koziña, enkuantu dezeja ba dezenvolvimentu liután kooperasaun amizade entre Japaun no Timor-Leste.

Obrigadu.
